



Inatsisartunut ilaasortaq
Malik Berthelsen
Siumut

Praktikerfissaaleqineq pillugu § 37 naapertorlugu apeqqummut nr. 2011-7-mut akissut

20. januar 2011
Sagsnr. 2011-044291
Dok. Nr. 544152

Asasara Malik Berthelsen

Postboks 1029
3900 Nuuk
Tlf: +299 34 50 00
Fax: +299 32 20 73
Email: kiin@nanoq.gl
www.nanoq.gl

Praktikerfissaaleqineq pillugu suliniutit kiisalu praktikerfissat amerlanerulernissaat siunertarlugu sanaartornermi neqerooruteqartitsisarneq pillugu inatsimmik sukaterisoqarnissaa pillugu apeqqutinnut Naalakkersuisut qujapput.

Matumuuna Naalakkersuisut sinnerlugit apeqqutigisatit ataani akissavakka.

Sanaartornerup iluani suliffeqarfiit angisuut nunattalu avataaneersut pinngitsooratik ilinniartuuteqartarnissaannik ilinniartuuteqarnerusalernissaannilluunniit Naalakkersuisut sukateriniarnerlutik periarfissanilluunniit pitsanngorsaaniarnerlutik?

Akissut:

Inuussutissarsiutinut ilinniarfiit 1. januar 2011-mi pisortat suliffeqarfiutigilerpaat namminersortut namminneq siulersuisullit, taakkunani inuussutissarsiortut aallartitaqarluassallutik. Taamaalillutik Naalakkersuisut naatsorsuutigaat inuussutissarsiortut ilinniartunik ilinniartitsinermit peqataanerulersinneqassasut neriutugalugulu qanimuunerusoq suleqatigiinnikkut aamma praktikerfissat amerlanerulersinneqassasut.

Ilinniarfiit aqutsisui siulersuisullu ilinniagassanik aaqqissuussinernut akisussaasutut Naalakkersuisunit kaammattorneqarput praktikerfissaaleqinerup qanoq inuusuttunik inuussutissarsiutinut ilinniartitaanernut tiguisarnermit unittoorutaannginnissaanut siunnersuusioqqullugit.

Praktikerfissaaleqineq inuussutissarsiutinut ilinniartitaanermit tiguisarnermit naammassinnittarnermullu unittoorutaassanngilaq. Taamaattumik inuusuttut ilinniakkaminnik naammassinninnissaannut qularnaarinissamik suliniuteqarput, tassani suliffeqarfimi praktikerneq ilinniarfigisami praktikernermik eqaannerusumik ilaneqarsinnaalluni.

Ilinniarfigisami praktikertarneq pilersinneqarpoq ilinniarnermi ukiut siulliit ingerlanerini praktikerfissamik nassaartoqarsinnaanissaa neriutugalugu ilinniarfinni ilinniartut amerlanerusut tiguneqartalersinnaanissaat pillugu. Taama iliornikkut inuusuttut amerlanerusut inuussutissarsiutinut ilinniarnerminnik aallartitsisinnaapput.

Siulersuisut Naalackersuisunit qinnuigineqarput makkununga periarfissat misissoqullugit:

- Piffissap praktikerfiusup suliatigut illersorsinnaasumik sivikillisarneqarnissaa, taama iliornikkut ilinniartut amerlanerusut aallartissinnaaqullugit.
- Avitseqatigiilluni praktikertitsisarneq, tamatumani suliffeqarfiit amerlanerusut ilinniartumik ataatsimik avitseqateqarsinnaallutik. Taama iliornikkut nunatsinni praktikerfissaareersut atorluarneqarnerusinnaapput. Avitseqatigiilluni ilinniartoqarsinnaalernikkut aamma suliffeqarfiit piffissani sivikitsukkuutaartuni taamaallaat ilinniartoqarsinnaasunut inatsisitigut piumasaqaateqartoqarsinnaavoq.
- Suliffeqarfiit amerlanerusunik ilinniartuutilit aningaasaqarnikkut akissarsisinnegartarnissaat aamma isumaliutigineqartariaqarpoq.

Maanna siulersuisut Naalackersuisunit qinnuigineqarsimapput praktikerfioreersut qanoq atorluarneqarnerusinnaanerannut aaqqiissutaasinnaasunik siunnersuuteqaqqullugit, kiisalu ilinniartitaanerni sivikinnerusumik praktikertitsisarnissaq siunertaralugu ilinniarfigisami praktikernermik taarsiisoqarsinnaanera imaluunniit sulineq sammillugu atuagarsorluni atuartitsisoqarsinnaanersoq misissuiffigeqqullugu.

Aaqqiissutissatut siunnersuut aningaasaqarnikkut missingiutitalik 2012-imut aningaasanut inatsimmut ilanngunneqassangatinneqarpoq.

2011-miilli praktikerfissat amerlineqarnissaannut aaqqiissutissatut periutsinik nutaanik misileraasinnaassagutta Naalackersuisut aningaasaliissutaareersuni tamatumunnga aningaasaliiniarniarput.

Sanaartornermi ilinniartunik atorfinitsitsisarneq pillugu minnerpaatut piumasaqaatit Sanaartornermi neqerooruteqartitsisarneq pillugu Inatsisartut inatsisaanni nr. 11-mi, 2. december 2009-meersumi § 1, imm. 2-miittut Sanaartornermi ilinniartoqartarneq pillugu Namminersorlutik Oqartussat nalunaarutaanni nr. 10-mi, 12. juli 2010-meersumi (ilinniartoqarneq pillugu nalunaarut) piumasarineqarput. Ilinniartoqarneq pillugu nalunaarut naapertorlugu neqerooruteqartitsisoq neqerooruteqartitsisarneq pillugu inatsimmi § 1, imm. 2-mi taaneqartuniittoq neqerooruteqartumut piumasaqarnissamut pisussaaffeqarpoq, taanna kingusinnerpaamik suliakkiunniarneqartumik tunineqarnermini suliffeqarfimmini erseqqinnerusumik aalajangersagaasunik ikinnerpaaffilikkatut ilinniartoqassasoq. Taamaattumik suliakkerneqarnissamut piumasaqaataavoq ilinniartoqarnissamik piumasaqaatip naammassineqarsimasutut isigineqarsinnaanera pillugu entreprenørrip neqerooruteqartitsisumut uppernarsaanissaa.

Neqerooruteqartitsisut neqerooruteqartitsisarneq pillugu inatsimmi § 1, imm. 2-mi allasimasut tassaapput Namminersorlutik Oqartussat, taakkununga ilanngullugit ingerlatseqatigiiffiit Namminersorlutik Oqartussanit pigineqartut, Namminersorlutik Oqartussat aalajangeeqataasinnaaffigisaat, kommunini oqartussat kiisalu sanaartornermi suliassanik sularinnittussarsiuussinerni neqerooruteqartitsisartut allat Namminersorlutik Oqartussanit taarsigassarsisinnegartut, tapiiffigineqartut qularnaveeqqusiiffigineqartulluunniit (tapiiffigineqarluni inissialiortiterneq namminersortunit, sanaartukkap tunniunneqarnissaata tungaanut nammineq

aningaasalersuineramik tamarmiusumik isumaginnittuusunit isumagineqartoq matumani pineqanngilaq).

Ilinniartoqarnissamik minnerpaatut piunasaqaat suliffeqarfinnut - nunatsinni nunanilu allani – neqerooruteqartitsisunut taaneqartunut sanaartornermik isumaginnittuusunut tamanut atuuppoq. Suliffeqarfik ilinniartoqarusuttoq aamma ilinniartitaanermut pineqartumut brancheuvalgimit akuerineqarsimasussaavoq.

Neqerooruteqartitsisarneq pillugu inatsimmi aamma neqerooruteqartitsisoq suliarinnittussarsiuussinerminik ima aaqqissuussisinnaavoq, ilinniartoqarnissamut tunngasut neqeroorutinik naliliinermi unammilleqatigiinnertut uuttortaatineqarsinnaanngorlugit. taama iliornikkut neqerooruteqartoq suliffeqarfimmini ilinniartoqarnermik uppersaasoq pisortat sanaartortitsineranni suliarinnittussarsiuussinerni unammilleqatigiinnikkut iluaquteqarsinnaavoq. Taamatut malittarisassaqaartitsinermi soorunami siunertaavoq "sanaartorneq pillugu isumaqatigiissuteqarnermut ilinniartoqarnissamik" piunasaqaatip pisortanit neqerooruteqartitsisusunit nalinginnaasumik akuerisaalernissaa atugaalernissaalu. Ineriartorneq Naalakkersuisunit malinnaaffigineqarpoq kiisalu pineqartumik malittarisassaqaartitsinissamik ingerlaavartumik naliliiffigineqartarluni inatsisiliornikkut najoqqutassiornikkulluunniit.

Inussiarnersumik inuulluaqqusillunga

Mimi Karlsen